

Inscunter interrumentsch a Turitg

Cant e crimi cun Benedetto Vigne e Gioni Fry

La URB – Uniun da las Rumantschas e dals Rumantschs en la Bassa – envida sin gievgia, ils 28 da favrer naven dal las 19.00 a siu emprem inscunter interrumentsch dad uonn. Hosps dalla sera ein Benedetto Vigne, cantatur ed autur, e Gioni Fry, editur e cantatur. Benedetto presenta siu niev cudisch «Ils ventganov da settember», in crimi. Ensemen fan els cant e musica.

Benedetto Vigne

Benedetto Vigne ci naschiu a Belluno ell'Italia e carschiu si a Salouf en Surmeir. Suenter il gimnasi a Mustér suondan studis da filosofia a Turitg. Vigne ha luvrau biars onns sco schurnalst e críticher da musica a Turitg ed era sco redactur da musica tier il Radio Rumantsch. El ei staus confundatur dils Dis da litteratura a Domat ed ei oz aunc suprastont dall'Uniun per la litteratura rumantscha. Sper sia lavur litterara ei Benedetto er staus regularmeim sin tribuna sco rockadur.

Vigne scriva ses texts litterars per gronda part en la lingua da standard rumantsch grischun, ton en prosa sco era en lirica e per texts da canzuns. Aschia ha el p. ex. realisau igl onn 2005 – ensemen cun Fry – ina cumpilaziun voluminusa da reprisas romantschas dils Beatles sut il tettel «Lain fabular». Ils texts haveva Vigne translatau per gronda part. El vala sco in dils piuniers e promoturs dil rock romantsch e dalla scena actuala da cantaturas e cantauturs.

Gioni Fry

Gioni Fry, naschiu 1970 a Mustér, lavura dapi varga 20 onns sco «graphic designer». Suenter la scolaziun grafica a Basilea e divers jobs en caussa ha el fundau a Turitg si'atgna agentura per comunica-



Ils hosps dalla sera: Gioni Fry, editur e cantatur, e Benedetto Vigne, cantatur ed autur (da sen.).

MAO

ziun e publicitad, la quala carrescha dapi 2009 sut il num Fry & Partner. Dasperas ha Fry lantschau la pintga casa editura Ediziun Apart che tgira surtut litteratura romantscha. Gioni ei denton era musicist passiuau, aunc a Mustér era el la vusch dalla gruppa Ba-Rock, a Turitg meina el gia daditg sco cantatur il duo Siat. El ei era separticipaus a divers projects musicals sco «Prisas-Reprisas» ni «Lain Fabular».

Vigne vegn a preleger ord siu niev cudisch «Ils ventganov da settember», siu emprem roman criminal. El vegn a menar nus sin trutgs strubegiai plein crutschs e surprasas. Produciu il cudisch ha Fry. Lez vegn lu era a saver relatar tgei ch'ei vul

dir fundar e menar ina casa editura specialisada sin la tgira da litteratura romantscha. En in text da promozion dil cudisch savein nus leger: «Las chaussas n'èn betg adina sco ch'i paran.» Gian Pellegrini sto adina puspè udir questa frasa. Il quarantard è sin fugia, a cha sia ha el sturni ses vischin en l'affect. Sin via en ina terra lontana entaupa el curiosas aventuras, el vegn confruntà cun filosofias, cun amurettas, cun cuntradas. Ma tge ha il raquint lateral, in di en la vita d'in pubertar, da far cun el? In roman plain tensiu e sensualitad, plain magia e poesia (Ediziun Apart 2018). Ei vegn offeriu in aperitiv. Tier in bien sitg datti era temps e peda per in bien

discuors. Ins sa era empustar ina fina tscheina. Fagei paleis quest'occorrenza ad enconuscentas ed enconuscents. Sin seveser!

La serada entscheiva entuorn las 19.00. Ins sa era vegnir pli tard cura ch'igl ei. Sin seveser ils 28 da fevrer ad Oerlikon.

La Giesserei ei da contonscher naven dalla staziun da Regensbergbrücke tras Affolternstr.–Oleanderstr.–Regensbergstr.–Birchstr. Ulterioras informaziuns sut: www.uniun-urb.ch e www.facebook.com/URB
Proxim inscunter: Gievgia, ils 16 da matg ad Oerlikon
Sonda, ils 13 d'avrel radunonza annuala, Neumarkt 5, Turitg

Per la URB: Ciril Barther

Artechel en *La Quotidiana* dils 22 da favrer 2019